



JUDICIAL SYSTEM MONITORING PROGRAMME  
PROGRAMA MONITORIZASAUN BA SISTEMA JUDISIÁRIU

*Komunikadu Imprensa*

*Tribunál Distritál Oe-Cusse*

*29 Feveiru 2016*

**Tribunál Distritál Oe-Cusse kontinua hatudu progresu signifkativu iha kazu sira natureza violénsia doméstika**

Iha 25 Janeiru 2016, Tribunál Distritál Oe-Cusse aplika pena prizaun efetiva tinan 1 ba kazu krime ofensa ba integridade fízika simples ho natureza violénsia doméstika tanba prova komete krime hasoru nia feen. Desizaun hodi aplika pena efetiva ne'e nu'udar agravausaun hosi arguidu ninia hahalok ne'ebé la kumpri notifikasaun desde hahu prosesu julgamentu to'o iha desizaun.

Antes ida-ne'e, iha 07 Janeiru 2016, tribunál mós aplika pena prizaun efetiva fulan 6 ba arguidu ne'ebé prova komete krime ofensa ba integridade fízika simples hasoru vítima ne'ebé sei idade menoridade (tinan 2). Vítima ne'e nu'udar DO nia oan feto ne'ebé iha problema ho arguidu.

Antes akontesimentu, arguidu no nia maluk sira duni DO to'o iha DO nia uma. Wainhira to'o tiha iha uma, arguidu hakbesik an ba DO nia feen ne'ebé kous hela vítima no kaer vítima nia ulun dada sai no soe tun ba iha batar kain nia leten ne'ebé butuk hamutuk hela iha rai.

Aktu ne'e rezulta vítima nia hirus matan moras no dada is ladiak. Kazu ne'e akontese tanba arguidu diskunfia DO mak na'ok arguidu ho nia kolega sira seluk nia animal.

JSMP apresia mudansa pozitivu sira iha tribunál, tanba hahu konsidera preukupasaun sira ne'ebé durante ne'e JSMP kestiona kona-ba efetividade hosi pena suspensaun ba kazu krime violénsia doméstika sira. JSMP fiar katak kondensaun ne'ebé apropriadu ba krime sira sei sai lisaun ne'ebé importante ba comunidade atu hadok-an hosi krime.

“Desizaun ne'e nu'udar avansu ida tan hosi iha Tribunál Oe-cusse durante tinan sira ikus kona-ba kazu violénsia doméstika,” dehan Luis de Oliveira Sampaio, Diretór Ezekutivu JSMP.

Iha tinan 2014 no 2015, Tribunál Distritál Oe-Cusse mós aplika pena prizaun efetiva ba kazu ho natureza violénsia doméstika 3; kazu ida kondena ho pena efetiva fulan 6<sup>1</sup>, ida seluk kondena ho

---

<sup>1</sup> Komunikadu Imprensa JSMP : ‘Tribunál Distritál Oe-Cusse kondena arguidu ba kazu violénsia doméstika ho pena prizaun efetiva fulan neen – 07 – Abril 2014| iha website JSMP: [www.jsmp.tl](http://www.jsmp.tl)

pena efetiva tinan 1<sup>2</sup> no ida ikus-liu kondena ho pena efetiva fulan 6<sup>3</sup>. Entretantu, iha parte seluk, iha tinan 2015, Tribunál Distrital Dili, aplika pena efetiva kazu ho natureza violénsia doméstika 1<sup>4</sup>.

Julgamentu leitura sentensa ba kazu rua ne'e prezide hosi Dr. João Ribeiro, ministériu públiku representa hosi Dr. Ricardo Godinho Leite no arguidu sira hetan akompañamentu legál hosi Dr. Calisto Tout hosi Defensoria Públiku.

Komunikadu Imprensa ida ne'e bele imprimi tanba ho apoiu jenerozu hosi povu Amerikanu liuhosi Ajensia Estados Unidos ba Dezenvolvimentu Internasioná I (USAID) bazeia ba Akordu Kooperasaun ho Númeru AID-486-A-13-00007 ba programa Ba Distrito iha Timor-Leste, ne'ebe nia implementasaun lidera husi Ajensia Counterpart International ho nia parseiru sira. JSMP mak responsabiliza tomak ba konteudu no hanoín iha komunikadu impresna ida ne'e nia laran no la nesesariamente refleta USAID ka Governu Estados Unidos Amerikanu nia opiniaun”

Atu hetan informasaun kompleitu, favor kontaktu:

Luis de Oliveira Sampaio

Diretór Ezekutivu JSMP

Diresaun e-mail: [luis@jsmp.minihub.org](mailto:luis@jsmp.minihub.org)

[info@jsmp.minihub.org](mailto:info@jsmp.minihub.org)

---

<sup>2</sup> Lee Komunikadu Imprensa JSMP: ‘Tribunál Distrital Oe-Cusse kondena pena efetiva tinan ida prizaun hasoru autór kazu violénsia doméstika: pasu pozitivu ida tan iha implementasaun LKVD – 14 Maiu 2014, iha website JSMP: [www.jsmp.tl](http://www.jsmp.tl)

<sup>3</sup> Komunikadu Imprensa JSMP: Tribunál Distritál Oe-cusse kondena pena prizaun efetiva fulan 6 ba arguidu krime violénsia doméstika iha período suspensaun ba pena prizaun – 5 Agostu 2015 | [www.jsmp.tl](http://www.jsmp.tl)

<sup>4</sup> Komunikadu Imprensa JSMP: Tribunál kondena pena efetiva tinan 1 prizaun ba krime violénsia doméstika WCJU-31-Marsu-2015 | [www.jsmp.tl](http://www.jsmp.tl)